

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1940

T 3200/0823.83 17

9

廣雅釋詁

卷之五

字類

齊十內復曰為聖本古聖賢與出此物為

無過則山而危守其建者其外精其本教

時無所為至較據有之世內名而者外可也

及解者為証茲聖錄其文亦求其於聖之

四境計之亦願後於聖此物之所也

聖之

廣德州志卷十三

哈佛大學漢和
圖書館珍藏印

營建志

寺觀

寺觀

青牛西度白馬東來寺觀繁興由此昉矣州之古廟
無過祠山而梵宇敕建者唐宋時凡十數處窮山曠
野瓢笠所至輒據有之間出名僧著於碑版摩挲所
及頗資考証茲亟錄其文亦求禮於野之意也然環
四境計之佛廬幾於櫛比楊志所列百餘猶謂緇流
棲憩之所概不具載而慨然於持鉢衲子多於隴上

耕夫蓋其俗尚鬼神又好佞佛故也僧多吳興人占
腴田傭耕自食叩以寺之創修始末茫無以應舊志
但書某寺在某處非盡訪求不力殆亦因闕黎罕遇
耳

天壽寺一名開化寺在州治東唐天祐間法苑禪師建原
名通天寺宋太平興國五年賜額明洪武中重修嘉靖
間設僧正司於此參明一統志南畿志通志其寶塔飛簷為岳武穆
所焚蓋金人竊據時恐其登窺虛實故也萬曆三十五
年知州何鳳起募民重修馮夢禎記歷七十餘年飛簷

復傾康熙七年知州楊苞捐募重修僧寶臻募建大殿

岑鶴記

參萬曆志楊李志

乾隆三十七年知州恒豫州判左宜

重修四十三年知州石應璋又修

馮夢禎開化寺重修寶塔記桐州治東開化寺蓋古刹
也建於唐天祐間而塔莫知所從第於巔石觀其記載
乃知是塔始於崇寧元年其肇創者宋榮宋宗而襄成
者施仁也至圯壞則其傳岳武穆禦金兀朮於廣德飛
矢火之而要未有據也迄今五百年於茲未有能新之
者郡侯議及此輒有難色獨何侯號近邾諱鳳起湖廣
蘄水縣人乃楚中奇傑海內斗山舉甲戌進士第補桐
土任葺文廟復學田諸凡倉廩橋梁祠宇壇社或因遺
址而飭新之或因侵沒稽志而整頓之勿避豪貴勿受
人言且建遊豫樓以省民建思過堂以自省無非殷殷
為國意至塔之修舉尤甚注念會生員施從賡陳堯言
施從策條呈便宜甫當意捐俸百兩為桐士民倡桐士

民踴躍從之鳩工聚材不期年而告成屬予記予曰是役也得毋左袒佛教與噫是大不然開化寺祝聖演儀之所而塔為東方文壁與衡岳相表裏前代元魁不乏而後覺少遜安知不緣塔之禿其巔耶侯作興文學靡所不至奈何不為此兢兢乎且塔之有頂如人之有冠冠正則儀如山之有峯峯頽則秀詩云嵩高維嶽峻極于天生甫及申四國于蕃四方于宣其此之謂乎勞瘁一時慶流萬禩侯之鍾福寧有既耶予謫判州時輒注念因內召亟此志未竟詎意侯不踰時而觀厥成耶萬曆三十年三月初七日起造是年八月中秋日成支費共一千餘按簿則生員陳堯言施從策督造則耆民劉灌劉應瑞盛廷敷韋三聘司帑會計出入則僧正司僧廣經矢心盟誓毫無濡染此皆侯激勸之力於是乎記皆大明萬曆三十一年癸卯六月賜進士第朝列大夫南京國子監祭酒前掌翰林院事嘉禾馮夢禎撰文郡人夏良心李得陽同書丹管九臯甯瑞鯉同篆額

國朝岑鶴重建天壽寺並寶塔記天造草昧開創之力維艱修舉廢頽繼起之功匪易惟佛祖福慧雙修龍宮之

巍煥若出天成開士心力兩竭梵刹之重光關於人事廣德州城有天壽寺建自唐之天祐寺內有塔始於宋之崇寧其來久矣逮武穆六捷時塔之層簷燬於飛矢百年以來雲霄壯麗等於飄瓦後郡牧近邾何公爰為修葺稍復舊觀七十餘年毋論塔既丹堊剝落寺亦為敗壁頽垣矣住持大師諱實臻號唵舟者幼而岐嶷長而穎異殷監四門幽求五歲不捨之檀施洽羣有無緣之慈澤周萬類發大願力欲重建塔刺史竹如楊公亦銳意軫修給單總甲保正募化得八百餘金重新浮圖數月之間七級巍峩接霄房而颺采九盤煜曜寶鐸韻而流聲非曰舉廢實為增華矣剩有三百餘金復謀修大殿楊公首捐貲三百金然亦任大費多矣師志意益堅多方拮据釋網重維元津更柁翬飛丹刻鱗翼雕輪佛殿聖像山門禪堂煥然一新且購田伍拾畝為香燈食用之資給禪堂僧眾以垂久遠遂使丈六金身蔭法雲於天際蒙塵鷲嶺耀慧日於康衢厥功偉矣不獨此也又築星橋以通利涉構禪堂於東門購田百畝齋僧施茶賑疲濟困建放生池於靜室購田百畝徒子法孫

膳生廣慈種種善事無不殫心竭力況佛殿浮圖雖費金六百餘又奚惜哉因拜手為記吏部觀政進士岑鶴撰廣德舉人陳哲書丹

案此寺今為祝

聖演禮之所一統志寺觀首此謂洪武中重建又有竹山

鎖山東泉及建平開法四寺昭德宮元妙存真迎仙

及建平白鶴五觀南畿志寺觀二十五所通志亦三

十餘蓋皆其著名者也州縣志所載不可勝計矣

聖感寺在州治東南隅唐天祐中法苑禪師建宋太平興

國五年賜額歲久傾圯萬曆二十一年知州段猷顯倡

募重建康熙二十年知州門可榮修建參萬曆久之又

圯乾隆八年知州羅儀募修有記

聖感寺碑記州治東南隅有古刹聖感寺始唐天祐尚書潘公施袈裟地為法苑禪師所建宋太平興國五年

賜額安國寺自元迄明傾圯幾盡時有無念師誓志鼎修募木於南山之南搬運維艱夜半忽大雨雷電晦冥

洪濤中見雙鯉導流十八僧人運木至寺前重煥殿宇郡侯徐公異其事請於朝敕賜聖感寺其名有自來矣

萬曆二十一年郡侯段公修之於前康熙十九年郡侯門公復修於後今又幾百年矣棟朽椽裂乾隆八年郡

侯羅公給募重修鄉耆護法捐貲寺僧叩募檀越共襄勝舉今已告竣佛相重光應將樂輸姓氏勒石垂久賜

進士出身誥授奉直大夫知江南直隸廣德州事會稽羅儀立

圓通閣萬曆志在州治西跨街而成案今在街南南偏有

僧房案明景泰間知州鄭賢修後圯知州鍾振重建有
記乾隆初年州人戈于岐濮陽緒捐田七畝僧心安記

三十八年燬四十七年州守石應璋命僧融璽勸募重

建五十三年州守胡文銓捐葺山門庠士方汝寧記

明濮陽傳重建圓通閣記郡治西百步許舊有圓通閣
釋子以奉彼所謂觀音大士者也與東佑聖閣南三峯
樓相鼎峙葺於景泰庚午鄭侯賢歷百二十年值今庚
午合浦瀾石鍾侯振以名甲第來守興革利弊士庶悅
服顧是閣關郡治風氣日就傾圯因僧正方燦請許以
義募且捐俸以倡遠近爭以財力助材新制美雖一隅
費將千金不煩官帑葺歲工畢興役之初二鵲巢於梁
工作紛紜竭來自適至閣成誕卯育四雛去謂非潁川
遺瑞乎事竣州人請記之石侯方丈田均賦簿書叢至
染翰未遑也因屬傳志之傳曰傳聞見道者不惑於邪

守正者不眩於俗侯之治桐務教化重農桑彰善癉惡
動師古人見道也審矣義所當斷不疑於毀譽不惕於
利害守正也固矣彼浮圖何為者而俯徇其請且捐貲
以為士民先豈福田果報之說雖高明者不能無惑與
侯曰不然古人舉事必順人情因時勢斯事集而民不
知桐俗信佛樂施此情之易順者也閣為州治西臂鍾
風氣萃人文繫非小小又時勢之必不可缺者也吾以
帑藏空竭之餘以營必不可缺之役宜就其素性且悅
者以默成之使官無興作之煩而郡有雄峙之勝耳福
田果報於我何有哉傳聞侯之教始恍焉有悟也侯疏
鍾秀水以道地脉於南築鳳凰墩以擁地脉於北惠州
人者甚至時則荷開並蒂麥秀三岐皆侯所感召也

指月菴本名曹家殿在州治東北當秀水出口度女尼乾

隆十八年重修有記

新增案以上
州城以下四鄉

慈雲閣在州東五里福星橋

新增

雲輝萼登福星橋慈雲閣詩一山如畫對層樓四面春風只自由舊燕欲來池岸綠新鶯將出柳稍柔年顏未老先憑藥風雅含情更欠愁此日聊隨居野外往來踪跡絕羊裘

彩虹菴李志在州東十五里

石溪寺南畿志州治東南五十里元延祐中建案寺在天

寶山中無一禪師建初名石溪禪寺天歷二年賜額太

平興龍寺有碑記

元俛文質無一禪師塔銘釋氏之教由迦葉得佛之正法眼藏遞傳之達摩達摩傳之東土其要使學者一念之頃深入闡奧故業空寂之士得其師往往攝衣而從其遊焉石溪無一禪師諱善會長沙徐氏子生宋景定壬戌正月初十日幼而穎悟依郡之湘山僧景祥薙染超然有出塵之志聞仰山雪巖欽公大闡其道遂偕鐵

山瓊師策杖踵門晨夕叩其宗旨忽覩樓前樹倒豁然心悟從是承受問難靡有疑滯無何欽公示寂師還湘山即南臺之麓誅茅晦處幾二十年至大間瓊歸自高麗以書致師勉師開法為人冀以同得於欽者弗之隋隊及瓊將終復致書囑師治後事師為建塔請銘敦同門之誼也廣德東山海智禪寺瓊之所創其徒以師與瓊同所自出百里重趼請師繼其緒時余守廣德介書幣以石溪延師開山師惠然不辭居民沈政先施地躬立精藍請額於官為石溪禪寺師卓錫而衲雲四集施者輻至郡人朱庭桂割田易山以廣其址湖廣平章昔利哈刺施財為營觀音閣下蔽寢堂宜興長者蔣□□乞受毘尼為弟子凡正殿三門僧堂衆寮庫室廊廡悉力成之門堂穹如金碧煥爛猶天設鬼運移西鷺而錯居中國使人愕然歎以為神也戊午師禮高峯法兄之塔於天目時中峯固請為衆普說者德夙學承風望光恨相見之晚也平章昔利哈刺監郡哈那海皆執弟子禮師未嘗以貴賤異觀晚年創造茶園退遂燕閒湖之何山以主席延師以年邁固辭不受暇日與侍僧行寺

後珠峯下囑曰他時當以陶器藏我於此時天歷己巳八月也未幾荆溪蔣氏強師過之道出吳而好事者遮畱之一日舟次當口一僧舍呼寺僧語之曰我舟速矣汝舟何遲衆莫測良久問之曰今日何日寺僧對曰十一月十一日師於是索浴更衣笑謂衆曰何天而非吾夜旦何地而非吾遊戲之場耶吾其逝矣懇畱遺偈弗致問殆以後事囑我乎即為具治喪之儀扶龕還山畱三七日將入塔郡之文武官屬而下僧俗千有餘人啟龕見其容貌如生莫不悲慟如失恃怙即遵遺訓塔於寶珠峯下時春秋六十有八僧臘四十有五其徒數十人參學弟子不可勝計偈頌語錄未及詒口傳誦之其門人惟守以住山頑石瑱師書并師行狀來豫章乞銘於余余與師相知惟深義不敢辭強為之銘銘曰無一無偏天地之先靈光獨耀遍滿大千六十八年以無為有心印雪巖了無纖垢死生既一貴賤等齊大闡厥教於石之溪有作口口有殿斯閣我師不知徒勤樸斲惟山之阿有塔陂陀我師入寂靡識其他羣有不有萬法

無界非色非空無內無外言無口口無紀無年山移谷遷吾師儼然通議大夫同知廣西兩江道宣慰使司事副都元帥僕文質撰前奉直大夫淮東道海寧州知州兼勸農事趙雍篆額翰林待制朝請大夫兼國史院編修官高昌僕王立書丹至元三年歲次丁丑三月十一日建李洞天寶山石溪太平興龍禪寺碑桐川之東南有山曰天寶有泉曰石溪湍流縈紆清澈可鑑林谷宛轉狀如城郭望之蔚然故老以為虎兒所宅而人迹罕至焉延祐三年口口守節齋僕文質欲卜其地為精藍以棲有道者聞長沙無一全公倡雪巖欽禪師之道於吳江致書幣以招之一見心契即帥里人沈政先兄弟施以為基延師居之郡庠直學朱庭桂以田易山凡四十五畝以充拓之時荆溪有長者蔣直心名道煇暨弟道高道和道晟咸好善樂施口口聞之慨然曰山奇人勝是可以興梵宇矣凡經營之事金穀之費吾悉能具於是闢地求材命工就役士庶歡同爭先効力明年祠佛有殿講法有堂晏息有室安禪有宇門廡庫廩庖福園圃以次粗備蔣氏復割膏腴之田一十五頃四十六

畝六分以供衆食師亦罄其衣孟之資置田百餘畝以益之甘肅平章昔里哈刺亦捐俸來助寺遂落成學者日衆天曆二年師示寂頑石瑱公主寺事化風益行有司以上聞錫以伽黎賜額曰太平興龍首增樓以縣鐘復建開山塔以藏無一之真身次作三塔爲禪侶及淨行者終焉之邱也元統口口年瑱公既謝事郡守嘉議秦良萬夫長完者帖木兒與衆堅請全公得法上首元照補其處照公行解精實爲藁林所推不一二年棟宇口口爲倍蓰致衆之多亦倍復謀諸蔣君更創傑閣以奉法界之三聖賢刼之千佛三學之百師皆範銅爲之適蔣君之室謝氏亡盡出其奩飾之又贖經律論大藏之文及諸莊嚴之具至是畢矣再紀至元三年攝寺事者以聞於帝師蒙錫法旨以寵照之言曰吾徒仰承前依克紹茲緒不待苦形勞志強求諸人而能成其志者其故何也實由國家崇重釋氏得以優游空寂興建幢利可不思所以宏揚真宗少答聖恩者乎猶懼夫久而斯志蔑聞將請銘於太史氏庶可昭誠於後尋使其徒元祐來京師求記於余余嘉其成功能不墜其師之績

不口口志而能事其本振其宗以報乎上也故爲之銘銘曰昔在有德窮巖獨處學徒雲集廼營棟宇匪曰興崇惟報之需匪曰高廣惟道之娛粵茲賢侯發地之秘值師之口口遂厥志羣豪畢從輸金布地載構載營禪刹具備日煥日隆光騰於帝興龍寶嘉製衣遠逮恩渥大賚克紹古今聖師寵護德澤愈深美隆道址斯震法音集釐報國彌遠彌欽至正七年歲次丁亥九月二十一日庚申奎章閣學士院承制學士李洞撰翰林待制兼修國史官奉政大夫揭傒斯篆朝列大夫平江路吳江州知州兼勸農事干文傳書

妙覺院在州治東南五十里明崇禎年僧三立建新增

桃花菴萬曆志在州治東南六十里明隆慶五年知州鍾

振重建內有田六畝

案南畿志有寺無菴萬曆等志俱列菴於道院之後

然寺菴雖有大小其為佛廬僧舍一也今但依四方遠近為次舊志皆不拘年代今亦仍之惟新增而無年者始註新增二字

白馬廟在州治東南六十里通苦嶺關明萬厯間重修又

州南九十里亦有白馬廟與寧國接界新增

雲山菴萬厯志在州治東北四十里元大德中建併東泉

案此菴今無知者則併入東泉久矣

東泉寺南畿志在州治東北四十里唐天祐中建萬厯志東北有

普照菴誤
今移後

大洞菴萬厯志在州治東北七十里宋乾道六年建**案**菴

在大洞旁因名今為寶相院康熙二十五年州守高拱

乾重修有記**案**相近有廣明菴相去五里有衡門菴

記云寶相院古刹也考州舊志始自漢唐依太極洞建焉桐之北山洞府之奇不勝數而此洞為最無論甲於我郡亦江右所僅觀也環以崑岫之蚴繆綴以筠蘿之邃密其中蛇行蚪折之致琳瑯珠玉之觀若二儀攸分元關一竅種種元幻不可勝計凡名人逸士所秉燭而題咏者或墨妙如新或字影漫滅即今之騷客文人傳聞而至者無不躍然稱快焉第以秘在深谷名不著於洞天福地間然擬之武陵仙源則又非桃花春水可慕不可尋也以故前代之蒞桐者如近邾何太父師鳴琴課治之暇載酒攜觴而寶相院以其所憩息也為之募資鳩工煥然鼎盛前此僧德雲實始經營今見如禪師矢志興葺而力猶未逮幸遇郡主高太父師夙資遠俗

曾一披榛其地而惜無召伯之棠陰可以稅駕遂因住持之請准給印簿為建理計何籍於楚高貫於秦異地異時而其事之相繼者先後有同心也因德雲死其徒悟真述其始終焉康熙丙寅仲冬立

案實相院舊志但名大洞菴建於宋非漢唐也記脫撰人不知誰所作也

清溪菴萬歷志在州治東北九十里宋淳熙中建

楊李志俱訛作

東

天寧寺南畿志在州治南二里許唐元和中歸宗禪師建

參萬歷志

王日如讀書天寧寺詩三十頭顱百不如擬將踪跡寄僧厨春深風雨花魂亂夜靜悲歌蝶夢虛有恨直隨流

水逝多情欲乞梵天除敢同年少彈文字怕有揶揄滿路衢

緣覺寺李志在州治南三里舊名普濟菴康熙四十六年

僧元正於蘇州恭迎

聖駕

賜額緣覺並紅衣龍鉢

靈應菴萬歷志在州南七里店明萬歷二十三年州民孫

楷造知州段猷顯扁先是楷與董世澄許墀建茶亭楷

捨田六畝戈洪敏田十畝孫希後田八分李大祿田并

地八畝令道士收息作茶以飲道渴皆楷為之倡更自

結菴作經久計焉

定慧禪寺在州南十五里舊名竹山禪院南畿志一統志

俱作竹山寺唐咸通八年建光化三年田頴改為瑞峯

永安禪院南唐保大丙辰僧道遇重修李約記明高祖

駐師廣德更賜今名并龍牌立碣以識嘉靖二十一年

山門火碣毀寺且剝落萬曆十四年知州陸長庚令僧

廣泰宗信募修萬曆乙未始就知州段猷顯為立扁額

參萬曆志及碑天啟間知州許國器又令僧慶福募修山門有

記

南唐李約瑞峯永安竹山禪院記西方有佛號天人師
歷曠劫總持出三界調御方便汲引應跡垂形托生王
宮示滅雙樹滅本不滅生亦不生演無為無緣之慈度
有滅有生之患故闢多寶之地廣闡浮世界具滿國之
相遍娑婆忍上俾觀相者捨妄生信崇信者超凡階道
教興之漸實在茲乎瑞峯永安禪院者長者過欽之別
聖咸通中請僧惠靜所建也茲地素鬱林巒多藏虎兕
蓋自傷行旅遂許為伽藍靜公將渡黔川長者與籌勝
乃然其請俄而卓菴每手植荳蔬必麋兔侵擾一旦矢
言於山靈曰畱老僧駐錫當為絕諸翌日麋兔咸皆屏
跡其感應也如此自是開林薙草結茅豎宇樵沉落泉
和埴調鉛螺髻珠纓漸莊嚴而有相寶幢香刹復聳兀
以干霄學空之人不絕如綫因為竹山禪院光化三年
庚申歲相國田公頴作鎮宛陵秋八月縣宰趙公信過
巖列狀乞更院額公俞其請復改瑞峯永安禪院焉垂
九十年三代安眾院在制城南十五里南顧則羣峯總
翠北瞻則萬井連光五壠堆藍有同靈鷲澗泉澄練還
類瑯伽挺蘭若之奇資林泉之勝者不可多繼矣住持

僧道遇院主僧法詮並心月無塵意花不染以璿璣迭資殿宇傾欹簷雷雕楹莫免風雨塵昏金象豈認丹青於是散募檀越及制城內外僧俗黑白衆於保大丙辰歲秋九月建大殿立泗洲地藏二堂重彩繪佛事周迴畫壁隱塑變相並重豎正殿禪堂厨庫房廊三門等鳩金揆材審曲面勢公輸落墨王爾操斤柱礎惟精樂櫨合度迴廊棲月正殿參雲梁橫而蟬竦不收瓦疊而鴛鴦若翥人皆悅力工不告勞其或風鐸語其高秋若聽梵唄夕魄映於藻井如見秋毫檜老松喬自同祇樹蓮紅竹翠寧謝給孤遊者忘歸禮者生敬足以崇檀信淨福資開士晏居德柳上人披口三乘精嚴四分喜成就志在宏持刺血嘗寫蓮經化導不忘勇進以爲非像不可誘善非鐘不可警俗因募衆緣鑄鴻鐘一口重一千二百斤實濟千口非侔九孔司曉昏於茲界覺遠出於塵寰會闔制僧尼大齋鑄鑄名氏功既圓矣利實溥哉柳公以茲院也百餘年間莫詳經始之由孰知重興之義特刊翠琰用永清風瞻須達之良因數莫能盡敘祇園之鉅績辭不敢誣時龍集庚午皇上御極之十年

也將仕郎試太常奉禮郎掌表奏李約述宋開寶三年歲次庚午七月庚子朔十五日甲寅過銳弟昌道姪延思延滔延禮等建案殫字字書無考
 明李徵儀重建定慧禪寺山門碑序桐川環山多深僻堪爲方外居予告老歸每暇曳策登眺其南昂然聳秀者有竹山焉去城不數里流泉石瀨爲之映帶逗以村壑郊原盡供盼矚故昔烏臺涂通判梧省史三州公餘遊覽興到畱題荒鄙藉以生色茲山創自唐咸通延至嘉隆始振後遭回祿僧寺剝落萬曆十四年長庚陸刺史爲之倡募僧廣泰拮据修葺歲事艱虞未竟其業又荷段公賜匾未幾謝去其元孫慶福請於許公印簿普化功成屬予誌之崇禎辛未孟冬郡人李徵儀撰

通隱菴萬曆志在州南三十里獅子山下明隆慶二年庠

生葛鍵捐造案相近有潮音菴

東山寺萬曆志在州南四十里宋元祐中建案寺額有曰

敕賜古刹云是宋欽宗己酉年立考欽宗無己酉己酉
乃高宗建炎三年也

昇峩菴續萬厯志在州南四十里

翠雲菴在州南四十里康熙戊申僧覺朗西月建有記相

近有勝佛菴新

顯聖菴在州南五十里康熙甲午建有記新

〔記云〕桐南離城五十里路傍有觀音菴年遠傾頽辛巳
春有石佛順流而下至菴前而止見者以為觀音顯靈
也遂名顯聖菴士女出銀助田重建廟宇衆姓蒙福且
來往徽寧旌邑者咸得歇息焉余捐俸外復建碑以垂
永遠廣德州吏日署督糧廳
事謝偉才撰康熙甲午春月

三昧禪菴在州南五十里雪水澗山勢環繞瀑布千丈順

治初僧覺悟於此結菴康熙丁未始立殿宇壬申住持

雪山重建有記新

〔釋雲石記〕雪水澗三昧禪菴者地頗形勝山亦幽深連
峯嵯峨流水潺湲瀑布淙淙千丈瀉玉誠有道者所樂
居也

國初覺悟上人始伐茅栖隱於此楞嚴禪師拓之易茅而
瓦至康熙丁未有西蜀蓮渠老人卓錫修行耕雲鋤月
於是鳩工集材百堵皆作妙相莊嚴金碧煥爍儼然一
化城矣庚申年雪山更建一樓造
三塔皆諸檀越成之康熙壬申年

石泉菴李志在州南六十里陳山僧行海建

永興菴李志在州南六十里

永福菴在州南六十里順治四年僧明珠建增新

靈山寺萬歷志在州南七十里唐天祐中建案明萬歷四

十二年僧性枝募修有記

李得陽重建靈山禪寺記余素懷禽尚之志總非即聞郡南靈山之佳時方業鉛槧未遑問勝地也比守潯陽得觀匡廬瀑布其飛湍噴薄洞賦心目至徘徊留之不能去始信李青蓮銀河落天之句不我誣矣嗣是轍迹半天下迄未有匹廬瀑之奇者撫楚之戊戌秋得請歸養之暇遂與一二友生青衫白恰筍輿遍陟既已登五巖探大洞諸勝矣居亡何而為靈山之遊以酬夙願入谷二里許石磊磊山足墊雉羣响山犬孤吠四顧無人蹤唯伐木聲與谷底相應又二里許折而東松柏數千株矯龍盤螭攫拏蔭映自此山勢愈高鳥道逼崩蓋輪蹄莫能從杖履而往數息迺到其瀑布并雲錦泉處不覺狂叫歎曰靈山奇絕一至此耶其洶湧奔噴不減匡

廬流而散漫旋而雲霞或濺如珠或掛如簾種種異態似又過之然而匡廬之瀑名噪寓內茲山太寂寞者何則以匡廬值名區得李供奉孟襄陽流寓其間品題豔嫩足志不朽而茲山僻在桐南寥寥閱千載從無名賢高士遊遨詠賞即欲不泯泯惡可得昔人謂勝地顯晦亦自有數謝靈運痼于山々冥摛窮討靡所不至而獨失一雁蕩今靈山飛瀑不遇太白浩然其人者深為堪惜而太白浩然不遇茲山一似靈運之失雁蕩者等余寧不尤于千古上重惜兩公哉余才名眇兩公不啻僥龍伯相去遠甚而行歌坐咏鉞屬以短記或後之好奇者聞而和之以啓名賢高士贊美之盛則茲山之不讓匡廬當且有日而今所言定山靈知已矣寺頽敝已久僧徒稍稍委去有僧性枝獨秉堅念苦持戒行且好與墨士遊時時摘山花採石蜜效殷雅為語重建寺渠輒首肯遂募貲四方戮力營度而其師祖圓通師通智並殫拮据肇其事于萬歷戊申之秋八月比癸丑春則莊嚴宏敞洵巨觀矣丐言於余余因為識歲月并附小詩于左 萬山迴合白雲深古刹蕭蕭竹樹陰絕壁寺觀

飛流懸萬丈參天怪石擁千尋登臺長嘯驚林麓把盞
高歌慨古今一片花飛春欲盡東風啼鳥自知心萬歷
四十二年甲寅二
月郡人李得陽撰

長生菴在州南七十里康熙年僧寂中建菴右舊有文昌

閣明初建明季燬有記旁有石刻不老泉三字

選佛道院李志在州南七十里成道山案僧松谷等建有

記

獅林菴李志在州南八十里僧通弱建

篆石菴李志在州南八十里四峯山之陽

方穀遊獅山篆石菴四山攢青冥連壑斷復續勢若蹲
獅王屹如撐鼉足迤邐折而南峭萼千尋轟忽焉幻神

工石篆紛垂玉半壁騰蛟螭天經煥梵錄藤蘿不敢侵
旃檀四時馥花雨散文殊松龕隱佛屋素月貼簷飛孤
雲傍岩宿曉曉望村墟濛濛俯澗谷天風送潮音高樹
鐘聲肅靜心參妙偈虛寮恣遠矚窅然萬慮空遙峯見
天目

西林菴在州南八十里明萬歷年間建新增

百泉菴在州南八十里順治二年建新增

廣福菴 陸家菴俱在州南八十里康熙年建新增

右辛豐寺案今作上新豐寺而州西四十里之上辛豐寺
作古新豐寺未知舊志誤與抑俗僧所妄改與

萬歷志在州南九十里宋元祐中建

崇法寺萬歷志在州南九十里舊作七
十里誤唐天祐中建案今

康熙年修

案寺有康熙四十四年僧耿契記云崇法寺古刹也始於唐貞觀間又云名曰下梅有渴想修治之意考萬厯志古蹟門下梅巡檢司基在州南九十里今爲下梅寺然則下梅與崇法本兩寺也但寺觀門不載下梅寺或前後異名未可知今乃混而一之又附會於渴想修治鄙劣已極此次所募碑碣南鄉最陋鮮可採者而此非惟不足傳信反足滋惑不得以其刻石遂濫入之也

明教禪寺南畿志在州西宋崇寧二年建案在橫山麓祠山事要云靈濟王廟南有明教禪院舊號看經院時以王崇釋教建焉今爲天寧萬壽禪寺然今寺額尙題明教焉

橫山菴萬厯志在州西五里宋淳熙中建

觀音廟萬厯志在橫山之巔知州陸長庚建

松蔭菴楊志在州西五里地名紮寨圩俗呼明菴卽此

三元菴楊志在州西十里石頂山嶺上濮陽樾建王書鄒

際曉等重修案是嶺俗呼三官嶺乾隆四十五年州判

左宜捐設茶會四十九年勸募修茶亭有記

畧云路當山僻暑天

苦渴因集同志捐貲於己未丙申施茶兩載又各捐錢三十緡購田十六畝八分永為施茶費名曰三元茶會

上辛豐寺

案今作古新豐寺詳前

萬厯志在州西四十里唐天祐中

建案今名閣下寺

武田菴萬厯志在州西四十里唐大同二年建

案唐無大同年號此

必有誤

古西竺寺李志在州西四十五里陽山

圓隱菴萬厯志在州西五十里明洪武元年建案今名緣

隱菴圯於萬厯三十八年重修於天啟元年吳僧海相

募建茶亭為施茶之所有記

誓節渡菴在州西五十里先有廟祀唐義民張姓

見壇後廟

廢止存是菴明季亦圯僧月空及其徒無得等募修順

治十三年成乾隆壬辰僧月德又修有記菴奉張公神

位里人春秋祀之

僧如解重建誓節渡禪林記天地之間久而不可磨滅者節義而已吾於張公有感焉張公不知何許人兼失

其名唐乾符三年黃巢倡亂荼毒生靈山南東道節度使劉巨容大破之巢與部將尚讓挾餘眾渡江東轉掠

饒信池宣歙杭等十五州眾至三十萬道經廣德張公無守土之命無討賊之權意氣所激不能自已乃率鋤

耨之卒數百人拒於溪澣力不勝駢首而沒里人哀而立廟祀之誓節之名所由始也厥後代更世易廟址俱

毀獨其表表高風猶與此渡並存溪上有菴繼廟而立其間興廢不知其幾沿及明季僅餘敗屋數椽徑封蘿薛戶網蠨蛸爰有月空禪師宜興吳氏子從蕪江南渡策杖過此遂卓錫焉其人貌樸而律精冬夏一布衲晝夜一蒲團恒持般若金剛經寒暑不輟為遐邇所皈依以桐川控吳越孔道往來雲水無掛鉢處意欲創建殿宇廊廡為接待所何期願殊宏而身先殞也今無得無念無量諸公皆其弟子也思繼其志于是疏募善信共勸厥事裕者以財健者以力辯者以言工者以技經營於甲子之春告成於丙申之夏頽風再振古蹟重彰塵世之招提即丹霄之兜率也功竣勒石屬予記之古舒如解撰順治十年十二月

胡文銓和李石帆贈月德和尚韻禪味誰傳香鉢珍新成精舍渡溪濱定知早破繁華夢應許同參寂淨因懷舊欣逢題壁客索書初識買山人推敲想見饒詩興水月松風景逼真王其福宿誓節廟和韻勁節英風自古珍乾符軼事問江濱渡名欲表忠貞跡廟額常昭香火因謁罷神龕悲壯士詢忘名字恨前人惟餘段守碑

堪讀擬並田橫最得真禪家麤糲當羞珍一宿無忘住水濱座上塵埃能不至壁間珠玉遂相因旄麾時駐居非陋稼穡知勤僧可人此地聞風猶起懦闍黎戒律自應真

普門菴萬曆志在州西五十里元延祐中建

資福寺萬曆志在州西六十里宋祥符中建

化成菴萬曆志在州西七十里元大德五年建

慶壽菴萬曆志在州西七十里宋咸淳中建案一名耕溪

寺乾隆年僧化成悟達募修

紫竹菴萬曆志在州西八十里明洪武五年建

牧馬寺萬曆志在州西南二十里唐天祐中建案宋江寧

府天蓋寺僧重建後有僧宛大又奉敕改建名勝果禪院明時燬雍正四年重建乾隆三十二年修有記

國朝陳遠牧馬寺記寺名牧馬於義為犗詢寺僧知舊在牧馬山之巔明宣德間始移今所蓋緣勢踞高峻故以木末為名山之名又因乎寺語久音轉訛為牧馬若蝦蟇陵寶所塔喜峯口之類舊云金人縱牧其地故名疑里人附會非實也地居山僻檀施頗少以故寺額闕如佛殿僧寮雖具而法像多不備康熙甲子寺僧募里人新之乾隆丁亥寺僧又募於里之好施者易棟宇增法像懸寺額鑄新鐘焉丁未始告成夫農家之入有限力作之民少閒今之佛相莊嚴金碧相間者皆先後出其脂膏輟其耕鑿以為之其事之智與否與夫儒者之所笑佛者之所誇姑弗具論要其皈依法教而所以事諸佛菩薩者則可謂誠且勤矣寺僧聚坤將諸施助勒名於石余為書其梗概如此乾隆五十四年己酉仲冬里人悔厓陳遠書

海會寺萬厯志在州西南五十里晉義熙中建南畿志在

州北宋熙寧中建案義熙熙寧相去甚遠必有一誤通志亦作義熙

龍駒寺在州西南六十里馬鞍山順治五年僧斯可創康

熙庚戌智鹵拓之有記新

釋智鹵記馬鞍山桐川西南之屏翰也距城六十里一峯峻拔萬岫雲攢雙溪環抱如垣巨石參天若柱其脉發自廣茗起伏猶象蹴獅行奔騰似鸞飛鳳翥所以面有天馬峯之引莽背有寶蓋峯之隨後左右太保二陵挾輔擁從而出其展眸也仙源兌涌其顧祖也玉屏震開觀音貽隱身之厓蟠龍彰出壑之勢龜蛇把關地結是矣而龍駒禪刹畫然闢其中也昔我法兄斯可禪師於明毅宗己卯嗣法弁山息影天目偶遊金陵憇息是地訪得山為濮氏之業初蒙助施次索值售乃縛茅栖止時

國朝世祖戊子歲也龍駒之額因馬得名未幾祝融肆毒
 檀信匡勳置產闢址始構大殿而禪堂厨寤相繼成矣
 是年丙申冬也時鏤塑韋馱尊天二像莊嚴甫具而可
 師西徂康熙庚戌余自楚衡大義山來主弁山祖席州
 中紳士偕本山法屬啟懇再三乃赴繼住時在乙卯秋
 也既蒞院事遂造大佛鑄洪鐘雕塑諸聖像將立方丈
 夢感庠生遙送香像時江南巡憲王公諱緒祖寵贈正
 宗不二之額其餘種種建立俱十方助施夫天荒塵壤
 開士雲來幽谷深林梵宮特立巍巍金玉其相重閣莊
 嚴錡錡鏗憂其聲長年圓演大功既竣爰述巔末記之
 於石康熙庚申重陽日曹洞三十世本寺第二代住持
 沙門智鹵撰

溪陽模遊龍駒寺羣峭列圍屏深坳藏梵屋陰凝暑氣
 寒嵐蔽斜陽促修篁掃碧天繞映鬚眉綠奇草弗知名
 藥苗香滿麓澗潛飲水彪林躍銜花鹿厨篔石泉清階
 抽新笋簇山僧不出山蒲團叅枯木有客寓雲房時偕
 楞嚴讀朝夕之梵音窮年坐空谷何以破寂寥畫眉啼
 深竹沈嗣進遊龍駒寺秋夜天際嚮征鴻階前咽晚

蟲秋深寒雨裏人靜遠山中村酒空浮綠
 燈花不剪紅坐愁方未歇落葉又敲風

永林菴在州西南九十里明季僧德清募建乾隆年僧法

尚修新

太首山菴萬曆志在州西南九十里宋皇祐中建案明洪

武年僧覺海卽廢址重建今康熙四十四年僧真禮修

有記

國朝趙嗣晉太首山仙神寺記桐之山發源於治南之太
 首嗟峨峯律甲於一郡故名首且曰太首山之巔有聖
 井焉大旱不竭清流瀉下百數武爲仙神寺誌載建自
 唐宋間歷元末僅存遺址云僧覺海於明洪武代披荆
 斬棘爲開山祖成化間盛安大啟梵宇鼎革後寢落十
 四世孫僧真禮復恢廓焉徒如祥踵事增華孫湛玉乞

記之勒石垂後
康熙四十四年

大山菴在州西南九十里明季建新

桐南九十里許山曰太首發源天目奇峯插天俯視諸山如百千螺髻巔有原泉冬夏不竭凡遇乾旱所祈最靈故稱仙神寺焉山之麓有大山菴者泉甘而土肥明季僧元進等自仙神寺徙居於此興宇以栖佛祖置田以為香火康熙四十三年春月

廣興菴在州西南九十五里麻家山頂順治六年僧海松

募建新

朝陽菴在州西北五十里白茅山洪武初建萬曆時名朝

陽禪院崇禎末重修或云梁普通時建有鐵佛康熙初

為豪民所毀知州陸翔華斷歸住僧融虛有記相去五

里有觀音菴新

明教寺在州西北五十里新

大聖寺在州西北七十里又相近有鶴林菴新

朝音菴在州北五里長塘保雍正庚戌僧靜安募建新

太平菴在州北七里店順治年僧智覺建康熙年曉蒼重

修有記新

記云菴之建自順治戊戌年僧人智覺始繼者智宏今住持曉蒼也曉蒼嘗言智覺因訪親來此有錢大道者於草舍拜禮古佛一尊發心建殿安之吳仲仁等捐貲起造瓦房三間即今厨竈所也又王介熙助田四畝五

分爲香火資康熙十四年智覺卽世智宏募買沈用丙地重建佛殿置田幾畝三十二年智宏又故曉蒼恪守遺業不敢浪費建茶亭裝佛六尊擴置田及山慮繼無人立石紀之康熙乙丑春月沈祥明記

二祭廟李志在州北十里

敬堂菴李志在州北高湖保楊志良造案去州十里

鎖山寺南畿志在州北二十里宋至道初建楊志作至一道二年

名萬壽院明一統志洪武中重建案明末燬康熙年僧

體真募建大殿未成實相繼之閱七年告成有記

國朝李勳重建鎖山大殿碑記予守桐川四載每於簿書之暇單騎循行觀風問俗復於朔望農隙集紳衿耆庶於道院梵宮宣揚上諭十六條仰體

聖天子化民成俗之至意焉丙子仲夏課農治北隅憩鎖

山見修竹長松之下古刹重新蓮堂法像色色莊嚴亦

桐北之偉觀也詳閱遺碑知斯寺始於宋天聖六年戊

辰迄大觀己丑有僧德華重修而倡首捐貲則甯湯勇

三姓相與贊厥成功歷五朝年幾千載其間或修葺或

重建不知幾更而今茲之輪奐其亦應運而維新者乎

進興人而詢其締造之由僉曰寺僧實相薤髮披緇數

十年於茲矣適際廟貌傾圮毅然以重新爲己任仍謀

諸三姓皆願繩其祖武復叩之諸檀咸欣善與人同由

是實相庀材鳩工宵旦拮据凡七歷寒暑而工始告成

較德量功大約首領仍歸三姓落成兼賴萬緣而寺僧

殫其辛勤供其糧糗厥功可列而三焉予採聽良久因

思天下事莫爲之前雖美弗彰莫爲之後雖盛弗傳創

也繼也皆人也廢也興也皆天也而予承乏茲土亦樂

捐廉相與有成焉是爲記奉直大夫知廣德州事三韓

李勳撰附趙嗣晉鎖山寺募大殿引吾桐多佳山水如石溪東

時名人騷士往往極登眺溯流波誇為韻事顧獨異夫
 大川巨浸造物若與人共之而宇中名山多為黃冠緇
 流之所私似水有不得與山等者此何以說夫佛道於
 江左為盛而兜率鉅觀般若勝地所在通有若所稱老
 子之宮於今亦少滅矣豈以我佛如來演說三乘十二
 分教利益眾生為能接引天龍拂除野馬乎晉客春讀
 書天如菴時過從雲子丹成把臂論心後益往來無間
 值夏初水漲不能會未幾過雲子詢曰州號山國而環
 子居皆水非此地一瀛洲哉如赤泥連檣黃頭鼓柁不
 再見何雲子謂吾子博士也豈其闔於風土此間滙一
 州之水大則汪恣浩瀚視江海正復不減而及其涸也
 猶然一壑耳且爾止臨流興歎曷不登峯詣極哉去舍
 不數里有層巖拔起支龍蜿蜒秀樾干雲修篁漏日法
 花忍草茁長續紛怖鵠馴禽飛翔匝繞拾級而登有寺
 踞於山巔琅函貝葉為緇素瞻仰地命曰鎖山厥勝舊
 而子未之知耶余聞之欣然欲往輒以他故未果然傾
 倒於是山至矣今春自都門言旋偕雲子丹成登秦岱
 一望羣山皆小涉河渡淮至大江謂天下之水莫過於

是然而高山流水每每分而不合又未嘗不歎三溪而
 兼鎖山者之為絕勝也夏仲過三溪訪雲子作鎖山之
 遊以遂夙志爰同家仲方虎循溪而上則見夫衆山迴
 繞一峯矗秀前瞰白馬官塘渟泓萬狀遠則天日數巒
 近則石佛笄山諸勝若環而抱若拱而揖余不覺心目
 俱怡歎雲子言為不虛未幾僧侶來迎余遂詣其頂瞻
 古道場禮彌陀三佛而環視墻垣已就傾圮仰觀椽楹
 已即頽敝乃顧雲子而歎曰嗟乎是寺素稱古刹而竟
 至斯豈衆比耶一空諸有遂舉巖巖翼翼者掃除之耶
 抑諸檀越虔奉無人而百年化宮與瓦礫同觀耶亟進
 僧問故知明季干戈擾攘意以道場為戰場曾有小沙
 彌匿佛像中見土寇舉炬火正殿不然如是者再其駭
 為神遂逸去然則數十年來鹿苑獅林不淪為虎豹藏
 窟者猶是佛光掩映此山有靈宗風當復振耳寺僧體
 真者頗不俗烹茗進山果繼以酒余與雲子暨家仲
 極竟日歡僧亦撐醉眼為一樽勸次辰返家往富春謁
 房師道由武林武林故山川秀絕處雷連盤桓遍遊西
 湖靈隱各景視吾桐若或過之而要以兼有佳山水者

則莫杭與桐若也居月餘歸自浙中適僧體真捧簿來
余家乞言於余資為建大殿募余既嘉僧之克光龍象
而又不敢以能文應也爰告僧曰萬象名區經營宏敞
衲子事耳吾何能之與有况桐久稱道院供養諸佛結
剃生徒者不乏則夫躬親勝因發願宏施作佛門善果
必多其人又何故之不新何廢之不舉乎且雲子丹成
世主是山於殿之建也必踴躍稱快由是布金以種福
田捨利以航慈海作四方領袖以壯三溪之勝使人指
而目之為山水秀絕處併雄視石溪東亭義蒼橫山
諸名境也非盛事哉非盛事哉而又奚藉於余言為

淨土菴李志在鎖山寺右案康熙年僧成舟建有記

記云淨土菴者康熙癸亥僧成舟所創成舟姓勇諱元
祥喜清淨蒲團面壁欲擇地而隱適有李景星者無子
而有田二畝五分在鎖山右頗高可居成舟售其半結
茅以奉景星夫婦續置田若干畝庚午歲景星死成舟
殯葬之更構瓦房塑佛其中增置田共四十畝甲申歲
遊吳門歸額曰淨土菴勒石記之康熙四十九年秋也

蓮心菴李志在鎖山寺右案僧成舟及其徒祖明建有記

記云鎖山右有僧成舟披剃淨土菴中積資置田予雲
友已敘之矣晚更建一所名曰蓮心經營方始病卒其
徒佛廣繼志成事復募善信勇鳴玉商侯昆仲裝塑佛
像焉康熙五十九年雲記又有祖明續置田記乾隆十
八年立

上柳寺通志州北二十五里宋淳熙中建

佛堂菴楊志在州北二十五里

唐興寺萬厯志在州北三十里唐武德二年建案舊傳劉

文靜故宅捨為寺久廢明永樂年州民許子賢重建萬

厯初僧性良修有殘碑

明重建唐興寺記桐川有唐興寺郊原數十里三溪繞其前五花枕其後唐武德二年文靜劉公故居文靜隨帝建節晉陽遂捐其居為佛舍厥畝千數厥椽百楹僧千人年代彌遠遭金兵火蕩焉坵墟迨宋暨元久作曠土我明成祖文皇帝時有鄉民許子賢慨寺之圯且盡也始再建之未幾天王殿災萬厯初年有僧性良吳之雒城人來此募建於鄉之諸檀越鳩材庸工易木柱以石隆棟巍梁不可石者仍樹之周圍完固香火可綿綿於萬禩矣崇禎辛未歲菊月立

普照菴萬厯志在州北四十里元大定四年建

天成菴萬厯志在州北四十里典史濮陽紹曾建

獨山殿在州北四十里衆山中此獨隆起土名獨山舊有

大山寺有明嘉靖年所鑄鐘現存順治初里人建張真

君殿及大士菴三官殿顏曰獨山殿新增

慶雲菴在州北四十里流洞保順治十二年建本名雲聚

康熙四十九年僧通彩出貲增修知州周在建改名慶

雲有記新增

重修慶雲菴記州治之北四十里有菴曰雲聚創自順治十二年歲久傾圯康熙四十九年普渡菴僧通彩過之惻然曰吾當葺之于是輪奐一新增其式廓余勸農至北郊憇菴中因更其名曰慶雲僧于普渡菴勤耕力作續置田一百五十餘畝上供香火下給住持恐後人不能守請余為記夫築室而居耕田而食艱辛子孫守之當念其苦行毋致惰棄斯衣鉢相傳勿替也乃空山之野衲枯坐無為反笑經營締造為多事孰能如僧之辛辛操作以有成乎且僧不以福田果報之說惑人而募人一錢一粟凡木石匠作之費悉自十

指出韓子謂浮屠家貪衆人之功爲己力僧獨不然僧之志可謂專而力可謂勤矣余故書之以爲游惰者警且戒爲之徒者日後不得博奕飲酒玷踰清規蕩其先業如有不肖蹈此以逆倫戒逐俾勒石永垂云雍正元年癸卯七月知廣德州事周在建撰

慶雲菴後序大凡寺院之創建成於施捨者居多乃予所聞慶雲菴則有異菴始名雲聚頽廢已久僧普點暨徒通彩通建以父子而爲師徒堅修好道不憚辛苦買基重造復置田百餘畝請州侯改名慶雲後普點圓寂通彩好善樂施叠建六橋菴業廢其大半通建絕不介意無何通建先亡通彩傷其弟共創之苦乃令其徒孫天緣等析居慶雲而已歸老普渡以承舊業又於兩菴立祭產爲師香火天緣克守先業數傳至界儀界明更能廓其殿宇振其舊規視前又勝是皆可記也雍正辛卯柯任翔撰

慶雲菴在州北四十里千口村初村人沈繼質繼質捨宅

爲菴康熙乙亥增葺有記

新

記云沈繼質繼質者千口村人性好善將庄房改爲淨室以田產所入供香火後有僧智松增建前廳壬申歲善士沈玉如慨助殿木三間僧本誠復捐己貲以成勝果迎師兄本蓮本如助理乙亥年構後殿一進側室四間由是佛刹巍煥垣墉敦固時康熙辛卯冬月也葛鳴翔記

大德菴萬曆志在州北五十里宋咸淳中建案萬曆三十

九年僧惟政汝明等重修古佛堂崇禎十年又建山門知州邵圭翁日襄先後有記

橫嶺菴萬曆志在州北六十里洪武二年建案今名圓照

菴陸鳳記在州北五十里元大德七年建明正統成化

間重修

國朝屢加增葺趙寅記

陸鳳五峯圓照禪菴記州治北五十里許地名橫嶺嶺之陽有菴曰五峯圓照禪菴山水環遶松竹陰翳益勝境也肇自元大德七年癸卯歲有扶桑國圓照亮禪師開山養道於斯正統丙寅金陵古菴淳禪師恢廓規模居士伏用昇助之後延浙江孤峯傑禪師領教事相繼更新視舊有加徵予文記之成化四年戊子春月直隸廣德州奉訓大夫知州陸鳳撰承務郎同知朱雍從仕郎判官張口將仕佐郎吏目趙俊杭村司巡檢楊口直隸廣德州儒學訓導胡口醫學典科王文僧正司口立碑現存

國朝趙寅記橫嶺山五峯團聚幽邃而高曠藏修善地元大德癸卯海外僧亮公開山顏額圓照歷四百五十餘年矣明正統丙寅金陵淳祖師建殿塑像廣置禪房其徒慧聰請州主勒石識焉康熙癸酉德初師重興殿宇

後有定峯師於乾隆己未募裝佛相又於丙寅創西樓辛未建東閣囑余登載焉乾隆戊寅桂月江蘇常州府

江陰縣儒學訓導趙寅蓮齋撰

資聖寺萬厯志在州北五十里

南畿志作州西

宋祥符中建

慈惠菴萬厯志在州北五十里元大厯中建

天成院在州北五十里康熙年僧悅慧募建有記

新

記云桐北郭五十里天成禪院有僧智尚者自言建平人姓錢父良仕伯良佑髦年樂善以田地山房助悅慧禪師為淨室而以智尚為之徒年今五旬焚香默坐而已康熙甲午記

崇福寺在州北五十里保安山舊名保安寺南畿志在州

北唐天寶中建萬厯志天寶七年建通志唐保大七年

建案久圯明重建康熙六十年僧我先募修乾隆二十年助寺遂終老焉

案保安寺建於唐為最古萬厯志云在州西六十里與南畿志言北者異通志作保大七年與天寶相去甚遠恐有誤郡人言今崇福寺即古保安寺也故去彼而錄此

般若菴萬厯志在州北五十里元大厯中建案菴在銀山麓明天啟間僧海容暨完初重修又名金水菴明末燬

康熙三十九年僧南溟重修有記

明金印榮記般若菴在銀山麓固南北之通衢瓢笠所依栖也其基始於宋伏沈二姓實開闢之有開士海容者駐錫久之天啟五年有心谷完初二上人至沈伏二姓畱居之時海容老死因其募修成樓房三十餘間增置田地四十餘畝供眾云翰林院修撰韓敬奉直大夫知廣德州事黎崇宣尚寶司卿李徵儀儒學正朱輅眉州清神縣知縣李希載崇禎乙亥晉陵了夢居士卿飛金印榮撰并書趙嗣晉記聞明時有開士海容者清修苦行心谷完初二上人克紹乃師募緣拓廓郡侯黎公侍御李公贈以克勤梵行一華五葉之額未幾為兵火焚掠樓臺鐘鼓化為灰燼今南溟禪師於康熙乙亥秋重建佛殿旋構茶亭買田濬塘改甃大路并將建普同塔以收掩暴酪可謂百廢俱興規模光大矣乃為之記康熙三十九年庚辰郡人趙嗣晉撰

圓覺菴萬厯志在州北六十里明洪武二年建

宗正菴萬厯志在州北六十里元大厯中建

瑞雲菴在州北六十五里康熙三十五年建六十一年重

修有記新

國朝張瑄瑞雲菴記瑞雲菴者創自康熙三十五年踞錢村之左為廣德通衢山環水遶林壑幽秀時有白雲瑞靄覆護斯菴故名瑞雲其始由山東郭客商於此過金牛嶺於傾垣敗壁間見一佛像抱至錢村客邸謀之諸友卜地立菴使金道人守之後僧崑源於菴傍增建佛像徽商陳爾祥復捐建兩進康熙六十一年華陽張瑄記

雲門寺萬厯志在州北七十里唐天祐中重建案本名正

覺寺久廢今尚有一鐘在城中某廟勒字云大元國江

東道廣德路雲門山正覺寺僧如雲等募造順治年僧化我創其址重修州判蔡之芳記

重建雲門寺記余按州志知桐川故多山水佳處精廬古剎星碁參錯其中而雲門寺尤峯迴澗曲迴然靈異在城北七十里花巖之左考厥所由則始創於梁天監癸未重建于唐天祐甲子嗣是千七百餘年綿延相續稱為三寶勝地云易姓之際揭竿蠡起法座傾頽迨順治九年兵燹初息宗僧化我者始慨然以經營為己任飭舊增新蔚然改觀皆穎餘甯公暨諸善信護持力也公於二十年前由選貢任余章華縣侯時余髫齡方以弟子員試前茅補廩膳生及余倅桐公已九十餘每促膝把杯不啻綺黃再覲既而公謝世有遺命以雲門寺碑記囑余余聞桐之衣冠耆宿咸集於北境而變革以後蕩無孑遺惟公為歲寒松柏徜徉世外且雲門廢而復整足以恣公之遊虎溪而嬉晚節惜乎余羈官守未獲置身三笑圖間而莊嚴梵宇取次告成化我可不愧

南國獅音矣康熙二十四年夏月署廣德州事判官今陞光祿寺典簿楚華容蔡之芳撰

黃栗菴在州北七十里近雲門寺康熙四十六年僧本如

法機募建有記又有紫荆菴永慶菴新

記云吾郡雲門山正覺寺稱古刹敝于兵燹鼎定初禪師化我重新之余與本如法機時相往還辛酉春循寺而行渡溪橋轉山塢不下二里經三平宕進五花崑新篁疎柳真堪入畫岡陵畢至泉勢飛來問其山主則甯氏也問其地則曰黃栗場流連久之顧二僧曰能領畧者誰乎不謂二僧先余屬意是年且募且買建塔於上名曰普同更平高下而創數楹焉甯公伯等復捐金買田以計久遠而黃栗菴於是乎成矣康熙丁亥冬月潘記

淨覺菴萬厯志在州北七十里元大厯中建

螺菴李志在州北七十里案菴創於崇禎八年至康熙十

一年增葺雲中官記

雲中官螺菴碑記天地間名勝之區往往與時興廢或奇麗奇特之區而湮沒於莽棘之中又或騷人墨客之所嘗表章而一旦廢為穢墟蓋亦有數存乎其間焉吾桐之南境多泉石之勝其北則遠壑幽洞往往如神施鬼設別有天地惜乎謝公之足跡未經柳子之品題不及無由傳於後世至如方輿所志梵林古刹號為唐宋以來勝地者間嘗登眺其間乃僅得頽垣敗礎於荒煙斷塹間往往而是亦所謂有數存焉也州治北七十里許有螺菴者前此未見於郡志也歲甲申僧某者詣余告其菴之自始謂勝國時崇禎八年僧某來自羨陽實誅茅結廬於此後增築精舍迄康熙十一年復創蓮寺其地勢則雲壑盤互煙巒矗立四望皆山環衛周遭而面乎五花之巖菴名以螺者所以狀其林壑之勝也余性耽岑寂方謝絕剝啄攜笈郊外期以來歲仲春躡屐

懷槩以領其勝槩而僧以刻期勒石固請自惟譎陋既不足以發川巖之美麗而亦未敢必夫是菴之興至數前此之數十百年止狐兔猿狖所叢集之場而今且為之峻其宇丹其楹既已如此其屹然矣則自此以後烏知其不為名勝之所又焉得以其不見郡志而沒其始事之勤也爰因其請而書之以俟夫後之遊此而能傳其勝概者

廣福菴在州東十里佛德岡度女尼雍正十三年監生王來儀為立石新增

案尼菴城鄉止此及指月故附錄之

以上佛寺

佑聖閣萬厯志在州治東跨街而成明萬厯間燬於火知州何鳳起重建北偏有道士居**案**萬厯志列之祠廟後

今從楊志移此閣久廢

元妙觀舊在州治南唐建本名天慶觀貞元初年改今名

明永樂三年重建設道正司於此嘉靖初判官鄒守益

以觀當文廟後徙東門外即觀址叙復初書院集諸生

講學其中今廢

參南畿志一統志通志楊志

案今元妙觀在東門外

即昭妃廟址

三官廟在州治東南東嶽廟前

新增

真武廟在州治北右偏初名元冥觀萬厯志知州鍾振建

以州治面笄山火星位水神以壓之也左有三官殿右

有文昌祠亦名元明觀郡人方粟有記李志年久傾圮
 國朝康熙二十二年知州門可榮修建今為真武廟五十
 八年知州周在建重修案乾隆四十九年廟祝永德募
 資重新山門殿宇大殿下添築石橋以通秀水里人方
 兆元記

案楊志謂元真觀康熙三年僧海清募建毘盧閣靈
 官殿知州楊苞改名一宿禪院李志因之考是廟未

嘗改為佛寺楊誤也

明方粟新建元明觀碑記嘗聞一命之士苟存心愛物
 於人必有所濟故君子之際遇或殊而其心自爾相孚

予郡治西北隅多曠原密邇冊府庫獄做備每加慎且
 治脉發自南笄勢甚亢後峙鮮稱里閭多火民不靜輿
 家謂補空斯無青越歲庚午春鍾侯名振號瀾石廣東
 合浦人由壬戌進士來蒞監司首屬均田出郭相方指
 示與往論符士民忻信子來畚築為鳳凰臺復建道士
 宮於墉內以祀元武水神為元明觀與臺相掩映焉觀
 之正宇雖弗宏峻其規制殊偉麗簷溜下環以一水直
 通洎川上駕石梁前湛然堂左右翼以三官廟文昌宮
 堂之前兩掖有舍曰悟真所談元處令道士居之週圍
 繚以甃垣題其門為元明觀又啓通衢抵巨陸立三市
 門商賈願藏於市經營廬肆奠民居也米鹽布縷足民
 食也什作器具前民用也坊表忠節正民俗也聯絡爰
 居以障州治萃風氣壯規模弭災禱祝國祚無疆之慶
 一舉而眾美集矣矧費力由眾助匪出官帑功緒易稽
 侯若罔聞昔若州之耆民王伋葛璜暨其子葛鏘王應
 科毅然捐附郭田二十畝助觀取租永充香火費夫自
 侯一令士庶翕然從風噫足以徵上之能官下之赴義
 矣侯雖改守蜀郡而生生之功在焉濱行囑予為記其

事夫子郡通顯者衆而顧予囑筆者何謂予居夾介嘗
 從事董役之末未幾吳侯中淮翁至名同春河南固始
 人中甲戌進士風采凝峻學識齋邃材節尤卓犖作士
 誠民日不暇食稽古咨衆汲汲以興革爲己任見郡之
 未備者亟圖之不匝月咸歌有天懿哉吳侯之心政他
 日之思必若今日之思鍾侯也二侯先後一揆由守桐
 者評之繁文正翠渠二公侶也廼庸作歌曰泖之臬兮
 泖且卑脈來謁兮承匪巋築臺觀兮經始誰后峙峨兮
 勢允宜神炳靈兮元武居彪青矜兮泉貨滋豈遊衍兮
 緣膏脂崇丕績兮臨水湄微鍾侯兮伊肇基吳侯蒞兮
 盛且猗心畫一兮政均施濟民物兮澤流澌一怙恃兮
 一思維歲億兆兮同龜著未肖祝兮縈吾私聽之可以
 章民心詔嗣政副觀風者矣二守榮城向君名大賢三
 守文台何君名仕廷皆泰和選士幕賓二峯徐君名一
 本咸佐治有聲學師海峯董君名輅芝山李君名嘉禾
 龍峯周君名諧少匡李君名口桂夙負士望勸相復初
 之教咸以虔祀阜下爲心夫吳侯正己率人故一時寮
 屬皆雋傑泖人罕觀之盛也均宜書明萬曆四年丙子

季秋吉旦立嘉靖甲子貢士衡府教授致仕里人方粟
 撰文并篆額賜進士出身奉議大夫戶部山西司郎中

郡人甯珂書丹

國朝周在建重修真武廟碑記案五方位南爲火北爲

水八卦之位火麗於離水麗於坎其在四旁則朱雀元

武有相配之功其在司命則祝融真武有各專之權故

郡縣之內必祀元帝此五行之正位三才之定理也廣

德爲江南雄州昔之元妙觀在儒學之後位居巽隅自

前代成化間莆田周公翠渠來守是邦則遷之城北位

殿宇於雉堞之間以三峯樓在州治之南其象爲火形

勢太高故元武一殿不容卑隘取其相制也亦相配也

康熙辛卯余奉

簡命得蒞茲土下車之後來謁神廟相其方隅雖合而廟

貌不整心怛怛焉其未寧也延及丁酉州治之左祝融

肆虐矣越明年州治之右祝融又肆虐矣余急爲追咎

曰水星不顯之故也率僚屬集紳士入廟周視見其殿

庭雖聳而危樓塞其前闕畧偏於右入門則難言軒爽

登堂則不見莊嚴改造之舉不容緩也因爲多方縮嗇

佐以薄俸得若干金訪郡之耆宿得陳子時祥者老成
 正直敦請督工凡一切修葺聽其商酌者民四人韋文
 發許雲臻方書升王錫恩分任勤勞不半年而工竣落
 成之日凡殿之上金碧輝煌而塵封者改觀矣殿之南
 樓閣開厥而傾塞者改觀矣殿之右則補以文昌宮殿
 之左則改爲三元宮客廳廳則位於樓之左僚舍則位於
 厨之後大門改居巽位餘屋列爲市廛一切位置得宜
 眉目清爽不惟人心稱快即神靈亦安有矣又何水火
 之不相濟哉住持道士又進而請曰廟有瘠田數十畝
 地遠而荒不惟無利亦且多累以多易少以瘠易腴爲
 將來守廟之計訪得其實遂從所請置秧田十一畝一
 分坐落梅花保草場圩地方計其租穀可食一二人亦
 可以善後矣因序重修之由并書於石以示廟祝使世
 守焉時康熙五十八年己亥仲冬月奉政大夫知江南
 直隸廣德州事加一級紀錄一次周在建撰學正
 吳寧謐訓導汪茂齡判官顧景昭吏目謝偉才立

昭德宮明一統志在州西五里唐名張君祠宋賜今額案

卽祠山廟也元有趙孟頫疏明永樂二十一年羅坤泰

御製詩碑稱昭德宮提點臣希謂盛希年也詳祠

迎仙道院萬厯志在州治西五里昭德宮之東宋淳祐間

建

昇平道院南畿志在州治南平頂山案院久廢獨存元聖

宮康熙五十三年僧智明修有記

平頂山元聖宮序桐郡南多勝地自太首靈山白馬龍
 潭諸山外平頂其最著者昔人言山不在高有仙則名
 茲山壘壘有仙人塚其碑曰葛仙之墓則有仙明矣而
 昇平道院係先朝所建雖道流絕跡元聖殿尙存衆檀
 每逢上巳奉祀勿替菴僧智明與其徒迪山恐後嗣之
 不繼也將捐助姓氏并山場田地勒石記之康熙甲午

孟夏

石巔真武廟萬厯志州南二十五里土名石巔舊有茶亭
 無帝廟萬厯十五年齊雲道士持真武像募緣至此遺
 之而去居停主人為張之茶亭神著顯靈祀之者咸得
 福田利益而祈嗣尤驗二十五年州庠生濮陽榛偕兄
 棘捐地醵金構廟五楹奉帝像居之約庠友春時作神
 會歲以為常案州西南七十五里又有真武菴

呂祖祠萬厯志在州東東亭湖南岸

蒼仙祠萬厯志在州東義蒼山中祠後有蟬蛻關

花祖祠萬厯志在州東東亭湖南一里呂花二仙俱有神
 應

案花祖不知何神觀其與呂祖同稱則亦道流也右
 四祠皆仙道萬厯志列之廟祠非也今移此
 以上道觀

右本州寺觀

開法寺南畿志在建平縣治東南梁建宋太平興國中賜
 額今僧會司在焉明一統志洪武中重建楊志墻垣民
 侵成路知州楊苞清理捐修如舊縣志正殿久燬雍正

七年僧了悟重建華嚴禪院僧燦文增建大士閣案正殿燬於康熙己丑至乾隆七年劉令育杰始勸捐修今五十二年始成前後計費萬金矣

案此寺建於梁世於建平為最古楊志但言修墻縣志祇云燬殿通志曰城內李志曰治左皆失之太畧今為參考餘則稍存其說可耳

存真菴李志縣治東洪武中重修

地藏殿李志縣治西

案縣志祠廟殿以名類相從楊李志因之不知其為

神為道釋也然如地藏泗洲灼知其為釋三清灼知其為道故三者移載寺觀

丁雲寺楊志縣東二十里

甘露寺李志縣東門外

覺海菴楊志縣東二十五里

案此下不言某志及注新增者皆據楊志

杯度菴李志縣東三十五里

施水菴縣東四十里

雙柏菴縣東南五里又有法雲菴

萬壽菴縣東南十五里

本覺菴縣東南二十里

梵王寺通志縣東南二十五里楊志此下有興覺寺

徐村菴縣東南三十里

靜安寺通志縣東北二十五里縣志僧永修悟如重建

清涼菴李志縣東北二十五里

東保菴縣東北三十里

望雲菴李志縣東北三十里

龍會寺縣東北四十里

刹海菴縣東北四十五里

大忠寺南畿志在縣東北唐貞觀中建

案此寺唐初所建楊志僅列其名於壽昌後李志縣志但言在縣東北通志因闕而不載縣志又訛作大中寺

鎮山菴縣南五里

松林菴縣南五里新增

妙音菴縣南十里

承嗣菴縣南二十里又有準提菴

廣德州志 卷十三
老松菴縣南二十五里

接待寺縣南四十里乾隆十九年僧明蓮重修大殿新

興教寺縣南四十五里縣志名雨花寺

普渡菴縣南四十五里新

邵冲菴縣南六十里

般若菴縣南六十里

慈濟菴縣南六十里

青正菴縣南七十里

塔山菴縣南八十里

高塘菴縣南八十里

碧泉菴縣南八十里

靜覺菴縣南八十里

泗洲殿明一統志縣南八十里唐有泗洲大聖殿顯靈於

此因立廟焉歲旱禱雨輒應

案楊志仙釋載泗洲僧伽大師唐高宗時從西國來

長安洛陽托鉢吳楚間手執楊枝世謂觀音化身中

宗迎住薦福寺三年示寂常經建平後顯靈於巖山

居民遂建泗洲大師殿奉之水旱祈禱有應考巖山

在縣東四十里則此又其別殿也縣南十五里又有

泗洲廟

妙喜菴縣西三里

田村菴縣西十五里

永寧菴縣西十五里

回龍菴縣西二十里

觀音菴縣志縣西二十里

澗西菴縣志縣西三十里

普明菴縣西三十里

寶光寺南畿志在縣西梁大同間建通志縣西南三十里

案寺本名桂林宋改寶光明萬厯間重修李得陽記

乾隆五十八年僧泰際等募修議復桂林舊額

明季得陽寶光寺重修佛殿記余閱舊記梁大同八年
敕置桂林寺宋至道二年敕改額為寶光寺歷年興廢
不一萬厯甲午居人王恢等倡修佛殿二年
工就屬余敘之萬厯二十五年丁酉夏日

禪墩菴縣西南三十里

明覺菴縣西南三十里

東塘寺縣西南五十里

寶林寺縣西南六十里

壽昌寺南畿志在縣北宋天聖中建通志縣北三十里一名雙柏寺

鎖山菴縣北三十五里李志又有太清菴古太清坊普濟菴古塔基永恩菴宗瑛建皆不詳其處

冥陽菴縣北三十里

牟村菴縣西北三十里

萬松菴縣西北三十里

珠子菴縣北三十里以上佛寺

存真道院南畿志在縣治東北唐貞觀中建明洪武中重

建內有道會司李志雍正八年重修

白鶴觀南畿志在縣西唐貞觀中建明洪武初重建楊志

康熙三十年重修有碑

越城觀通志縣西北二十里

陽春觀通志縣北二十里

三清殿楊志縣東城隍廟左案此必道院也附見於此

以上道觀

右建平寺觀

廣德州志卷十四

營建志 塋墓

塋墓

過墓必式古人禮於死者如此後世則有發邱摸金者矣然而聖賢前詰體魄所藏必爲之置守戶禁樵採或表封或遣祭彼富貴烜赫視一聚枯骨何如哉桐川墓域舊志所載甚少加意訪求就所見增入使慕古者知所瞻仰至於窆齒掩骼義重前經李志附見今因之

唐

尚書劉文靖墓南畿志云唐劉文靖公墓在州北三十里

萬歷志云在唐興寺側今廢

案南畿志止載此及劉王三墓

兵部侍郎潘晃墓在州東北四十里東泉寺後

案晃以縣吏入京夢張真君助靈禱雨得授本縣令

而贈真君為水部員外郎改橫山曰祠山事詳祠山

事要不言晃終為侍郎然今東泉寺後有墳山立石

題識現存寺大殿東廊肖真君及晃二像真君在東

晃在西冠服如唐侍郎之制則必非妄傳也

茅王墓在建平縣東北十里南畿志云廣袤數畝履其上

則隱然有聲去墓數里有茅王廟未知何代明一統志

云塚中空多蛇人不敢近其茅王廟鄉人亦不知為何

神

夏侯塚在建平縣西十里南畿志云有石如碣深陷土中

其巔半露而無款識舊嘗掘視眾莫能舉遂止明一統

志云里俗亦無知其人者

案南畿志建平止此二墓

案右二墓不知其年代以由來已古附列於此

宋

處士清容先生查深墓在州東南七十里烏石保

周在建墓道碑記宋處士清容先生姓查氏諱深字道源清容其別號也余自束髮後即耳先生名高風亮節為宋大儒生徒受其業者不下千數幾幾乎與鹿洞鵞湖相頡頏獨是廣德僻在山間顧安得投跡其地一拜先生之祠耶私淑之誠惟有托諸空願耳歲辛卯量移是邦聞

命之日或有以桐俗易治地樸民淳為余賀者余曰然有是言也蓋桐之民去先生之世雖已數百年而其流風未泯固宜其若是下車之日即詢諸紳士無不頌先生之德不休余心滋喜方欲一拜先生之祠以慰夙昔之願迨訪其族姓實為後衰考其里居則曾未有過而問焉者嗚呼噫嘻大賢如先生尚不能綿百世之澤耶此皆守是邦者弗能培植之故余按廣德志城西有清容講堂為先生授徒處今已不可問惟去城數十里則先生之墓在焉余於是單騎衝寒披荆剪棘履荒邱而躡躅撫孤松而盤桓舉目蒼涼不勝興廢之感然而先生

之德容道範不啻相遇於高山流水間也今既拜其墓並植其後裔則僅有存者間得一人爰俾受書於塾以奉春秋之祀雖不敢云發潛德之幽光續名人之墜緒而數十年欽崇愛慕之私于茲少慰焉祀生查啟能全子名貴請勒石以表其墓因敘始末登諸碑板庶幾文人學士有所景仰樵夫牧豎知所畏敬云爾康熙歲次甲午年孟冬之吉奉政大夫知江南直隸廣德州事加一級紀錄一次大梁周在建撰

左司員外郎倪濤墓 據倪氏譜在扎書錄解題曰呂居仁

為誌墓 案濤之父從永嘉徙此倪氏譜乃云蘇州吳興名大茂者徙此濤其元孫其失豈特數典也

侯賢將墓在建平縣東北三十里

案楊志云相傳唐侯君集以開國策勳後因太子之變及與難家人挈棺葬於此迄今呼侯賢將墓然不

可考又云君集死在關中不得建平有墓今考萬厯志不言侯為唐人而縣志有侯巖仕宋為江州團練使有勇畧世稱侯巖將據此則侯賢必侯巖之音訛也因改附宋

吏部尚書沈虛中墓在州南丹井山

奉議大夫潘敬墓萬厯志在建平縣南七里楊志塔塘冲

宋高宗御翰卒贈奉議大夫潘敬所葬

大提點吳應龍墓楊志在建平縣南二十里吳村山案端

明殿學士錢于定誌墓云淳祐五年十二月在原通鄉

之原

案楊志云宋諭葬考墓銘並無其事萬厯志亦無是說不知楊何據也

修武郎王機墓萬厯志在建平縣南五里楊志鎮山之麓

宋監驥院官修武郎王機所葬吳應龍誌墓

校書郎章汝鈞墓在建平縣東二十里檀園

尚書鄭清之墓萬厯志在建平縣東北四十里楊志在獨

山南沿口嶺下相傳南宋鄭清之流寓本邑卒葬於此

墓南發砌遺迹尚存

〔案〕楊志云鄭清之浙之鄞人理宗朝為右丞相淳祐九年為左丞相十年致仕封齊國公奉朝請越六日而卒初未嘗至建平而謂其卒葬於此果何據耶或別有顯官而誤其官未可知也通志直作丞相鄭清之墓

直閣梅應發墓在州東南五十里上中保

錢王孫墓萬厯志在建平縣東北三十五里楊志作三十

里在南店村後相傳宋吳越武肅王孫鉞李志作錢廣端宗

時徙建平卒葬於此

參軍趙時踐墓萬厯志在建平縣南楊志宋末攝縣事參

軍趙時踐死難縣南溪中縣卒取屍焚之埋於溪南岸

上其妻子僕妾八人同死者亦瘞沙中今踪跡泯沒無

從尋識

元

廣陵侯貢士濬墓建平存藁在南鄉交洪山元統三年敕

翰林學士歐陽元撰神道碑諭祭山環水秀松柏鬱然

至今尙有侯手植之樹

知縣王勉墓在建平縣東七里陳村元本縣知縣王勉所

葬縣申

明

禮部尚書錢用壬墓續萬歷志在青雲樓左知州段猷顯

立石學正李日滋磚砌康熙魚鱗冊墳地三分長九弓橫八弓積柴拾貳弓四至皆馬

田

周廣業謁錢尚書墓因錄其碑城角荒阡橐筆過依稀碑字費摩挲與朝典禮尊儒術南榜聲名重甲科塋制幾人論石獸採樵無地到霜柯平原蔓草知何限空對西風寄恨多

案碑係萬歷丙申年立中書明禮部侍郎前狀元錢公考明史用壬官尚書非侍郎會試南榜第一亦非

狀元也當時品官塋制置石羊虎望柱皆有定數萬歷志稱此為榛邱則其荒蕪不始於今也

贈懷遠將軍劉成墓通志在州西七里岡南畿志成靈壁

人國初以元帥守長興戰死賜葬於此案明史成爲永

興翼元帥數敗張士誠兵與李伯昇戰死贈懷遠將軍

立廟長興萬歷志云高帝命謝元吉護喪葬此撥民沈

福壽守之子興遼東鎮撫永樂十九年祭祖告贖原山

二十一畝嘉靖五年孫常以山賣西門雲氏塚竟蕪沒

判官鄒守益爲修塋立碑其山東至昭德宮去墓一十五步西至雲氏墳山去墓一

十八步南至濮鉉田去墓一十五步北至昭德宮山去墓三十四步

知縣李良貴墓萬厯志在建平縣東三里楊志洪武初任

本縣李良貴所葬

翰林院修撰王叔英墓南畿志在祠山東麓大學士楊士

奇道經廣德題其墓而祭之萬厯志楊士奇題其墓曰

嗚呼翰林修撰王原采之墓成化十二年知州周瑛修

葺樹碑後知州孫紘置田二畝屋三楹正德七年知州

劉節增置田歲寒食重陽日州率僚屬儒官祭掃嘉靖

五年判官鄒守益修墓道令王府官濮濬劔祭廳三楹

楊志 同 乾隆五十四年知州胡文銓重葺並有碑記

周瑛墓記去廣德城西五里許王修撰墓在焉修撰故

台州人姓王氏名叔英字原采素有氣節仕建文朝為

文字官未幾文皇帝南巡原采募丁壯廣德遂自經死

自為贊及詩尋有詔治姦黨其二女赴井死其妻繫獄

死人為上其所賦詩上曰彼食其祿自盡其心耳乃置

不問初原采將死以書抵祠山道士盛希年曰可葬我

祠山之麓希年卒收葬之蓋原采希年同台州人故托

以後事正統中少師楊公士奇始為題其墓曰嗚呼翰

林修撰王原采之墓且為文以祭之原采嘗薦楊公建

文朝久之事定故及此原采無後墳墓鞠為邱莽所可

識別者僅有楊公之碑而已瑛初為進士時嘗聞其事

於鄉縉紳及官廣德以特羊祭於墓繼而訪諸故老得

其遺事為詳云原采入廣德未幾車駕渡江羣臣出走

原采募丁壯番上遇兵部尚書齊泰來奔皆潰歸原采

以齊為二令州人執之既至告以故其夕原采引決原

采死時年未四十蓋其見義之明殺身之勇處死之不

亂良由其有所養非若一時忙迫失據計出無聊而自
 經於溝瀆者之可比也。因念其行誼之篤且悲其無後
 而為修治其墓并述其事以告後之人。或議之曰：原采
 建文臣子不為諱而表彰之非罪耶？瑛曰：不然。自古
 忠臣義士皆各為其主耳。原采仕建文朝，故忠於建文。
 若仕于太宗朝，其忠于太宗也。必矣。況兩朝天下皆太
 祖高皇帝所經營之天下，兩朝臣子皆太祖高皇帝所
 培養之人物也。譬如天地分為四時，凡禽獸感時而鳴，
 者雖有春夏之異，要皆造化中物，未可舍此而取彼也。
 議者謝曰：子言是也。麗牲有石，其鑱諸鄒守益重修
 墓記。君子之學，求無愧於心而已矣。無愧於心，則無害
 於仁。故簞食豆羹處之，猶富；抱關擊柝處之，猶貴。鼎鑊
 白刃處之，猶生；而況其他乎？彼多行可愧而冒焉以居
 之，若臧氏之位為竊，原氏之老為賊，賊與竊皆蹠之徒
 也。如使盜蹠而富貴，且壽三尺童子，其孰肯願之？故曰
 所欲有甚於生，所惡有甚於死，非獨君子有是心也。君
 子能不失其本心而已。昔者嘗怪夷齊之事，富貴人所
 欲也，而遜國以逃，死人所惡也，而諫伐以餓，彼獨非人

之心，腹腎腸乎？而甘於流離，困踣若得其所。大欲者，彼
 其心誠有樂乎此也。仁者安仁，樂之也。知者利仁，勉之
 也。其求無愧於心一也。以司馬遷之博聞強記，而追憤
 其事，至呼天以訴之。夷齊之心，其真知之者鮮矣。國朝
 靖難之師，靜學先生王叔英以修撰奉命募兵廣德，事
 不可支，沐浴具衣冠，書絕命詞，復為贊書於案，遂自經。
 於元妙觀之銀杏樹，其詞從容和平，有采薇之遺音焉。
 有詔治姦黨，其二女赴井死，其妻繫獄，死人為上其所
 賦詩，上曰：彼食其祿，自盡其心耳。乃置不問。嗚呼！盡心
 之義大矣。盡其心以殉君之謂忠，盡其心以殉父之謂
 孝。盡其心以殉夫之謂貞，貞烈之女志士，思以為配。忠
 義之士，明主思以為佐。故文皇帝之言曰：使練子寧等
 在朕固當用之。蓋至是好惡定矣。羣臣祇若德意以好
 懿德，凡飭邊豆崇墟墓，罔有弗虔。先生墓在祠山之麓，
 東里楊公士奇題其石，翠渠周公瑛述其事。嗣是置產
 立祠，相沿弗懈，守益承乏，是邦感先生之義，迺移元妙
 觀於東郊，而建祠於樹下，屬之學宮。命義民濮濬葺理
 其墓中為碑亭，繚以周垣，榜之曰：懷忠使過者式焉。復

為論次先生之心以詔來世繫之以辭曰人受中以生孰非正氣嗜慾所伐天機日瘁有能充之塞乎天地課其得喪孰愚孰智西山之薇噲彼千駟聖謨洋洋來者其志之嘉靖五年歲次丙戌四月既望賜進士及第判廣德州事安成東廓山人鄒守益撰及題額同知陳宣判官周明德訓導李元莫晦胡伯麟同建
 葺靜學王先生墓祠記謹案建文臣靜學王公叔英天台人也弱冠登朝抒布謨猷靖難師起公自白下募壯士古鄆圖為建文羽衛逮大司馬齊泰來告以故時已孤忠無措迺竟引決北拜者四踊哭者三畢命老子宮樹試反覆絕命辭與所為贊其事誠慘而其死誠從容也使非羽士盛希年卜窀穸於祠山之麓先生不幾于暴骨乎血灑中原風聞流涕少師楊公以推轂故而題其墓郡倅東廓公郡守翠渠公亦為增修碑記班班可考至刺史中淮公始構堂而奠焉祠曰表忠歲久闕理蕪穢不治頃緣長僚二室段侯於巒序橫岡各新合祠以祀不惟使神有所依且人有所法余展祭悽惻漸為整葺焉因捐俸鳩工哀材諏日庀事工善吏勤不期月

祠宇一新眾僉謂當刻銘余惟為臣死忠為子死孝先生氣塞天地先生精貫日月翼扶名教培植臣綱非忠而何且安人金死于經為夫而死非節而何二女死于溺為父母而死非孝而何節義在一門而風化徹九有損滅在俄頃而聲光迄萬年其關係名教大矣仲明代匱于茲欽嚮之懷粉榆之情惺惺於衷儻於形神所棲恻然不為軫注甘自下於黃冠者流非夫也既竭蹶竣事因搦管摛辭式歌以祀焉辭曰繫惟先生賦天正氣山斗為瞻綱常是繫心貞鐵石義埒邱山方軌夷齊以障頽瀾腥風咽血白浪翻空光飄漢雪氣吐長虹骨化形銷名高恨咽見節當年埋忠萬劫祠山之祠芳魂所止不愧不作焜燿青史我來繕葺詎曰偶然聿隆鄉誼尤尚高賢曰惟忠孝百行之門凡厥有位視此刻文萬曆二十六年戊戌菊月穀辰徵仕郎判廣德州事山陰潘仲明撰
 胡文銓重建修撰王公祠並修墓道記綱常之在天地間所係非小矣夫人之能以綱常重者必其明於君臣之義者也而其見義既明殺身獨勇者雖千百載後猶凜凜有生氣焉前明建文朝靖難師起修

撰王公墓兵廣德聞南京失守沐浴具衣冠為絕命辭復為贊書於案遂自經於元妙觀之銀杏樹下道士盛希年收葬之祠山之麓尋以詔治姦黨其妻金氏并二女俱死焉正統中大學士楊士奇題其墓曰嗚呼翰林修撰王原采之墓且為文以祭之成化中知州周瑛憫其無後修墓立碑為之述其事嗣是知州孫鏐劉節先後為置田畝建墳屋歲寒食重陽州率僚屬儒官祭掃嘉靖初州判鄒守益移元妙觀於東郊而建專祠於樹下為碑以誌之令義民濮濬葺理其墓是修撰王公之舍生取義迄今猶昭然在人耳目間其有墓有祠亦歷有年所矣夫人特患不能達觀於生死之關束身於名教之地耳苟能視死如歸自可立名不朽蓋人雖亡而自有其不亡者存原不因祠宇祭祀以為重也獨是修撰王公以一儒臣從容殉難妻女俱亡死而無後傷已而三尺孤墳竟聽其鞠為茂草數椽祠宇又任其毀諸風烟將何以慰忠臣義士於地下乎銓不敏臨牧石封以己酉春三月祭於修撰王公之墓問所為祠宇已蕩然無存僅有敗址頽垣委諸荒烟蔓草間而已因庀材

鳩工剋期歲事規制悉期堅實以冀妥侑修撰王公之神且為之清釐添置祭田以綿祀事庶可昭茲來許用繼從前守斯土者之表揚忠義耳落成之日為之紀其巔末并繫之以詞曰曷日大呼鄉勇畢集丁壯直前不敢匿此見公募兵時也軍令森嚴義形于色尚書來奔即被執此見公進征時也慷慨悲歌從容引決媲美夷齊忠尤烈此見公自經時也嗟乎惟公浩然之氣塞乎天地故節義之名光於日星所持者定而見危授命所存者正而殺身成仁彼其可創建而修葺者特祠廟耳其不可湮沒而勿傳者乃精誠也乾隆歲次己酉夏五月

賜進士出身

誥授奉政大夫知安徽直隸廣德州事前戶部江南清吏

司主事管理飯銀庫總辦軍需局事務加五級紀錄八

次大興胡文銓撰并題額

明楊樸祭王修撰墓祠山東麓翰林墳烟草離離對夕

曠往事何人持定論表忠無石勒遺文夷齊就死今高

節王魏倫生孰獎勵我黍守桐來拜禮一卮清醑薦香

芹〔濮陽鉞〕弔王內翰墓三尺荒邱鎖綠蘿清風千載
 等夷齊野雲拖雨山前宿林鳥傷春月下啼正氣堂堂
 天地老丹心耿耿古今稀一回惆悵一增重指顧雲霞
 落照西〔段〕猷顯王修撰墓蒼松翠柏倚孤岑下馬遙
 瞻淚不禁一統乾坤真主定半生忠孝史臣心芳魂漫
 逐黃雲結幽恨還同白日沉一自望之殉晉後祇今千
 載嗣徽音
 國朝周廣業跋胡郡守重建明王修撰祠碑江行經羅刹
 我懷黃侍中憑舷弔以詩靈瀾生悲風綏安王修撰事
 與文節同募兵未及集金川烈焰紅聞變遽引決妻女
 皆效忠却望祠山麓弛擔方忽忽賢牧出碑記詞義偉
 且雄云是正統間表章來鉅公踵事得州守祠祭禮從
 隆所嗟墓田荒積久難善終龜趺春草沒鴨脚秋林空
 振興會有待隼旟臨江東百廢具修舉忠烈尤褒崇翼
 然見遺址屋宇視昔豐香火計綿遠拓地非一弓麗藻
 述巔末貞珉新磨礮行者下馬讀盛事傳山農美哉儒
 術效施設殊恢洪風聲從此樹寧第
 石墨工政成垂不朽彝鼎銘全功

御史胡虞墓在州西南四十里墓東保箬塢冲

建昌知府孫日升墓在建平縣〔萬曆志〕作孫長史墓

訓導謝士貞墓楊志在建平縣永樂間任本縣學

山西巡撫諡莊介姜洪墓在州西南七十里前冲舖

案萬曆志載中丞墓地頗佳族駟給伊孫買去葬逼

中丞墓前二丈中丞有甥戈某具詞州守何公以其

既賣且葬置勿理李得陽曰案會典中丞之墓前後

左右各方十步是謂禁地私買與賣並不可公見典

遂與改正據此則是墓為諭葬可知而舊志反不之

載何也

副使呂盛墓李志在建平縣北四十里大栗園

案萬厯志載建平墓自茅王夏侯至呂副使其十四所皆不書名今據李志補之

寧陽縣丞濮陽瑾墓在州南五十里黃柏鋪

戶部員外郎王世祿墓在州西五十里誓節渡保

贈戶部尚書李得陽墓在州東三十里九里岡萬厯間諭葬先是鄭宜人葬此吳興朱長春誌墓李得陽有詩云定知死後還同穴却恨生前不再逢

碑現存

贈兵部尚書夏良心墓在州東二里星橋保下馬橋甯謙

慈雲閣訪衲雲上人詩歸去城頭日欲斜修巢語燕立

晴沙臥麟高塚今如是誰識當年司馬家自註路經外

曾祖夏司馬公墓卽其舊居也良心季弟蘭溪主簿良

器墓在州北二十五里後岡保結義山泰和郭子章表

墓

碑存

大理寺丞李徵儀墓在州北五十里二十一都通志史可

法誌墓

文存

廣西布政司參議宣城沈寵墓在建平縣周公冲其配崔

孺人先葬此王畿為志墓

見龍谿集

隱士甯時墓在束翠山甯謙有詩

見藝文

判官劉曰吉墓在祠山麓與王修撰祠相近曰吉宛平人

康熙二十四年來判州後卒於官妻程孺人亦卒二十

九年知州毛渾合葬之有碑

祀田六畝四分在東門外泥渚頭祠山道士收租為

清明祭費者

民司其事

八角墳李志在建平縣南二十五里夏司馬所葬一在縣

西南三十里處士王建極所葬

案夏司馬無考故與履壇俱列於明末

教諭鄧京埋履處在建平縣西南二十里京去後所遺履

義士何應孝捐貲二十兩購牟姓山一號瘞之附葬其

配黃孺人壇周八尺山廣八畝實三畝六分名曰履壇

後訓導滕文昭合家病故雍正十二年俱葬之壇前見

縣志

案此條舊附厲壇後今移此

娘子墓萬歷志在州東二十里中山靖王妃墓案在今蘭

塘保有斷石柱二埋土中俗呼小娘墳

案桐川樂府據漢史謂當稱廣德王之妃不當稱中

山靖王因云中山靖王景帝胄廣德彝王中山後自

景及成百餘年焉得有妃葬桐川此是鴻嘉以後分封事妃死應系彝王字其說似也但彝王所封實為今之黟縣此地不得有墓況娘子之名起自六朝北齊書裴讓之嘲祖珽曰一妻耳順尚稱娘子唐宮中號楊貴妃曰娘子體儀如后是也漢時王妃初無此稱今姑仍舊志書之不知則闕如也

雙玉墓 **萬歷志**在州北七十里 **通志**烈女趙氏墓明嘉靖間趙氏女許字步漑未嫁漑客死女聞自經死遂合葬焉知州朱麟題其墓曰雙玉

冥寧謚樂府勿謂我生未諧 仇儷樹已同根 花已並蒂 勿謂我身未奉衾 稠生也同戚 死也同休 夫病而死 女縊而亡 異棺同穴 將翱將翔 連理之樹 應生墓門 比翼之鳥 應伴貞魂 太守曰 否事有定 評念彼決烈 豈兒女情 名可維風節 可勵俗 大書特書 表曰雙玉

烈婦塚在州北二十里 **萬歷志**楊邯舖北旁有一橋 **李志**云名小娘橋

冥寧謚樂府楊邯之水 匪劍匪戟 我行賴之以禦暴客 楊邯之水 亦清亦碧 我行赴之 鑿茲肝膈 有力可 要有險可厄 不謂烈腸自此巾幗 流 水咽聲斷 橋傳跡奇 節芳名千古 無斃

義婦塚 **楊志**在建平縣東三都張公廟側 **案**此即溧陽丐婦也事詳列女

附

義塚在州治東門內本舊倉基不知何時改爲義塚康熙

四十九年修築圍墻乾隆五十年拓地併增砌墻垣有

碑

東義塚萬厯志在州治東五里地名星橋岡計廣二十畝

知州辛禮置凡貧民死無所歸者葬此嘉靖六年判官

鄒守益勸監生夏森立碑豎坊今廢但存其山案李志

州以李志乾隆二年方榮吉捐山十六畝三分坐落東

鄉陳草塘離城十五里

新東義塚在大東鄉星橋保俞村北畔計廣六畝六分餘

乾隆五十七年知州胡文銓捐俸買民人李世安之山

置有碑自南路丈至北塘計五十六弓自東夏山界丈

至西夏山界計二十八弓半積一千五百九十

六弓計山六畝六分五厘西義塚萬厯志在州治西五里地名侯家圩計廣一畝知

州辛禮置李志乾隆二年生員濮陽允昇捐山四畝坐落

坐落祠山廟西道士吳勝先捐山四畝坐落祠山廟

離治三里方榮吉捐山四十畝坐落西郊官塘

新西義塚在西城外扎寨圩計廣四畝三分餘乾隆五十

七年知州胡文銓捐俸買民人沈順弟之山置有碑自東
吳山界丈至西路計二十七弓自南塢宕丈至北包田
計三十九弓積一千零五十三弓計山四畝三分八厘
七毫五絲

南義塚在州南門外一在山川壇左約計山一畝零上有澄清

碑亭 一在馮下保葛家冲約計山八分與陶姓山毗連

新南義塚在州南城外田家冲保計山地一畝四分五釐

八毫乾隆三十六年知州恒豫捐置有碑東至大路西至溝南至李

田北至王田

北義塚李志乾隆二年步士進捐山二畝治北五甯天章

捐山五畝坐落甯村保離治五十里

鄒守益瘞枯骨文予初蒞任謁山川壇於城之南見枯骨暴露為犬豕所噬念爾等皆吾赤子初無罪惡特以貧困無歸遂至於此惻然痛心有淚盈睫即歸謀諸同官咸加哀憫議以厲壇之隅收藏爾骨爾等其安宅土勿為疫厲以病吾民

縣義塚楊志在建平縣南五里許土名柞冲山三十畝用

價十兩稅存原賣主王繼祖戶每年以本山松木充之

永為例又一在縣前郎溪渡南岸一在縣北二里

縣新義塚楊志在建平縣南鎮山之下萬曆二十六年知

縣朱之楫捐俸十兩買居民王士章山地十畝另建於

此季志長百弓闊三十弓共計三千弓四圍以堦爲界

